



*Iesus montre par paraboles le deuoir des bons Pasteurs,
& l'iniquité des mauuais.*

N verité, en verité, dit Iesus-Christ aux Pharisiens, celuy qui n'entre par la porte de la bergerie des brebis, mais y monte par ailleurs, est larron & brigand. Et qui entre par la porte, est vray Pasteur des brebis : le portier ouure l'huis à celuy-là, & les brebis oyent sa voix, & ne suiuent point vn estranger. Iesus leur dist cette similitude, laquelle ils n'entendirent point. Et derechef ie vous dis, que ie suis en verité la porte des brebis ; & si aucun entre par moy il sera sauué, & trouuera pasture. Le larron ne vient sinon pour dérober, tuer & destruire : ie suis venu afin qu'elles ayent vie plus abondamment. Le bon Pasteur met sa vie pour ses brebis : mais le mercenaire s'enfuit, & le loup rait ses brebis. Ie suis le bon Pasteur, & connoy mes ouailles, & suis aussi connu d'elles : ainsi comme mon Pere me connoist, aussi connoy-ie mon Pere, & mets ma vie pour mes brebis. I'ay aussi d'autres brebis qui ne sont point de cette bergerie : il me les faut aussi amener, & elles oyront ma voix, & il y aura vne bergerie, & vn Pasteur. Pour cette cause le Pere m'aime, pour autant que ie laisse ma vie, afin que ie la prenne derechef.